

Die z'Lieschtel obe, die chline Buebe,
 suche ä Ort für ä grossi Gruebe.
 Sie hei dänggt uf Blaue oder Zwinge
 chönnt me dä Drägg ämol ane bringe.
 Dass das eusi Quelle chönt kontaminiere
 intressiert wohl niemer und mir reklamiere:
 Hunderti vo Laschter chöme denn cho z'fahre
 und löh dä Drägg denn ab em Chare.
 D'Laufetaler finge, löht die Quelle in Rueh
 süscht mache mir no dr Angestei zue

Mir Grübler finge z'Lieschtel bim Regierigsrot
 wär all de Drägg am richtige Ort.

BREXIT – dä Entscheid us Ängland hei mir eus zum Vorbild gnoh.
 FEXIT hei mir bschlosse, um jetz d'Fasnacht z'verloh.
 Doch si eus jetz Bedänke cho, wird eus das ächt übel gnoh?
 Dr Raini seit, die Knallchöpf miese explodiere.
 Was dänkt dä, wenn mir eus sälber demontiere?

Hollande und Merkel si zämme im Kino gsässe,
 hei verliebt usem gliche Bächerli Popkorn gässe.
 „Harry Potter und die Heiligtümer des Todes“ isch gloffe
 und die Zueu hei das Tête à Tête ganz offesichtlich gnosse!
 Zwüschedure hei si chli anenang umegfingerlet
 und so nid gmerkt was über d'Linwand flimmeret.
 Dr Potter het churz ämol si Zauberstab gschwunge
 und scho hei sie d'Brite nüm im Eurorum gfunge.

Ä Grübler wett o so-n-e Zauberschtab ha,
 damit är z'Laufe Brugge versetzte cha

Blitz, Donner und Räge
 isch für Laufe kei Säge.
 Hämmere, schrube und bohre
 und d'Archenoah isch gebore.
 D'Fluet isch cho vo dr Holle obe abe
 sie het dr Meierlimei grad begrabe.
 D'Lackschüheli si jetz futsch,
 drum gits grad none mol e Gutsch .
 D'Pföschte tie aber nid verschwinde
 klar, do muesch jo s'Böötli abinde.

Dr Imhof und d'Asprion hiehnere durch s'Stadthuus,
 si stark verwirrt und chöme nüm drus.
 S'Natel im Aschlag und d'App aktiviert,
 und dr Hofer und dr Bolliger si archiviert.
 Dr Buecher und dr Stähli,
 zangge sich im Sääli.
 D'Seebärger het's noni kapiert,
 Pokemon go isch nit traktandiert.
 Dr Ziltener seit: „So jetz isch Rueh,
 Türe uf und Klappe zue“.

D'Kuonen und d'Nufere si nümmi gwählt.
 Hei halt s'Ergäbnis ä bits verfählt.
 Dr Buecher muess o nüm go sturm laufe
 jetz cha är jedem Stadroot e Grill verchaufe.

Jo oder nei oder öppe Nau,
 das sorgt im Stadroot für e Stau.
 Step vor het dr Preesi-Alex welle,
 Step zruigg seit dr Egli, bruchsch eus nüt verzelle.
 Über siebe Brugge muesch au nit goh,
 die einti blibt a däm Ort bestoh!
 Es isch alles sowiso Papperlapapp
 mir Laufner schigges - dr Bach ab

Mir im Baselbie si fründlich jede Tag,
doch zwe Brieder verweigere dr Handschlag.
Über d'Gründ miesse mir nit diskutierte,
cha jede sälber drüber studiere.
Mir Grübler griesse jetz o nüm, us guete Gründ
und zwar die vo Lieschtel, das wär jo ä Sünd.

Mir Grübler, d'Blauner und d'Zwingner si froh
het s`Volk d`KRIP nit ahgnoh

Chunsch zobe hei vom chrampe
und wotsch durch Brislachstross stampfe,
das goht denn gar nüm wie friehner,
ohni z'luege, wie blindi Hiehner.
Dr Schugger Max isch am tobe,
so chumm i nie meh zum Fürebe.
Dr Schugger Chrischt, dä blitzt für d Chatz,
zagg, scho hauts dr Nöggscht ufe Latz.
O dr Fahrlehrer Hänz cha nüm gradus fahre,
süscht demoliert er am Änd no si Chare.
Mir rede do nit vom Slalom am Chuenisbärgli,
wo eusi fahre wie die letschte Zwärgli,
und eusi Freud isch gar nit gross!
Mir rede vo dr Brislach-Stross

Dr Donnie Trump und dr Richtrich Rolf hei Gmeinsamkeite
tie si doch ganz viel Schtuss verbreite,
Märli wie's Trudi Gärschter tie sie verzelle,
dr Rolf hett au s' Burger-Presidium welle.
dä vo Amerika isch jetz Presidant,
und dr Anger schtricht witer sini Wannewänd.

Eus Grübler bruche die zwe nüt verzelle
mir chönnte grad bedi uf d`Stross use stelle

Es chrost und giert und knackt und stöhnt,
mir Grübler hei eus lengscht drah gwöhnt.
Letscht Joor si a dr Fasnacht Ziegel gfloge,
drum het meh am Zischtig dr Umzug fascht verschobe.
Das Joor het me no meh Ängscht zum Fasnacht mache,
s'Dach vo dr Katharine-Chilche chönnt jo chrache!
Dört isch alles morsch und dürr,
dr Zahn vo dr Ziit isch halt wie ne Gschwür.
Es isch o kei Chohle umme
das isch letscht am Änd jo s'Dumme
Und so tuets halt witer knaare
will o dr Kanton muess spaare.

Mir Grübler würde gärn Neegel und Schrube spände
und s'holz vo de Wageclique chönnt me o grad verwände.

S'isch nit eifach und nit liicht,
wenn dr Max durch d'Gegend schliicht.
Au dr Chrischt chunt usem Schatte,
sie packe di bedi nit i Watte.
Hesch denn no ne dummi Schnurre
denn ghörsch se aber bedi chnurre
Fahrsch durchs Stedtli, chunsch is Schwitze,
wenn si im Büschli hogge und tie blitze.
Si mir doch froh, hei mir die zwe!
Süscht geeb's negscht Joor kei Zödel meh!

NASEGRÜBLERGUGGE
LAUFEN 1984

